



Pineqaatissinneqarsimasut tarnimikkut nappaatillit paaqqutarineqartarnerat katsorsarneqartarnerallu pitsaanerpaaffissaminniitinniarlugit aningaasatigut, allaffissornikkut peqqinnissakkullu sulisunik nukissanillu qanoq qularnaarisinnaanitta misissorneqarnissaa siunertaralugu nassuiaasioqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut. Nassuiaat UKA 2025 nallertinnagu Inatsisartunut agguanneqassaaq.

(Medlem af Inatsisartut Anna Wangenheim, Demokraatit)

(1. behandling)

Qujanaq Demokraatit Inatsisartuni ilaasortaataannut Anna Wangenheim-imut siunnersuummut pitsaasumut, qanoq ililluta pineqaatissinneqarsimasut tarnimikkut nappaatillit paaqqutarineqartarnerat katsorsarneqartarnerallu pitsaanerpaaffissaminniitinnissaanut tunngassuteqartumut.

Piffissanngorpoq, pisariaqartumik alloriarnissarput maani nunatsinni pineqaatissinneqarsimasut tarnimikkut nappaatillit pitsaanerusumik passunneqarnissaannut qulakkeerinninnissamut. Taakkorpiaat ajornartorsiortorujussuupput, uagullu Demokraatini isumaqarpugut, isumassorneqarnerisa passunneqarnerisalu ukkatarineruneratigut utersaartoornissaat pinerloqqeriataarnissaallu annikillissinnaagipput, napparsimasunut, qanigisaannut inuiaqatigiinnullu nuannaarutaasumik.

Ajoraluartumimmi qularutissaanngilluinnarpoq, peqqinnissaqarfipput unammilligassarpassuaqarmat tarnikkut napparsimasunut tamanut tunngatillugu, tamannalu pineqaatissinneqarsimasunut tarnimikkut nappaatilinnut tuniluulluni. Maannakkut ingerlatsinerput aqqissuunneqarnikuunngilaq pineqaatissinneqarsimasut tarnimikkut nappaatillit pisariaqartitaannik immikkuullarissunik sullissisinnaanermut, kingunerisarlugulu naammangitsumik passunneqarlutillu tapersorsorneqartarnerat. Ingerlaaseq ullumikkutut itsillugu napparsimasut maani Danmarkillu akornanni uteqattaartinneqakkajupput. Pitsaanerusumik attaveqatigiinnissaq pisariaqarpoq ataqatigiissaarinnissarlu napparsimasut ataqatigiinnerusumik passunneqarniassammata napparsimasumut iluaqutaasussamik.

Pineqaatissinneqarsimasut tarnikkut napparsimasunut pissutsit pitsaanerulersinnissaannut, pisariaqarpoq, nukinnik amerlanernik pigisaqarnissaq pingaartumik ilinniartitaanermut piginnaasanillu ineriartortitsinermut, qulakkiissagatsigu, sulisut ilisimasat pisariaqartut pigissagaat aammalu piginnaasat pisariaqartut pineqaatissinneqarsimasunik tarnikkut napparsimasunik sullissinissamut.

Taakku saniatigut pisariaqarluinnarpoq, pineqaatissinneqarsimasut tarnikkut napparsimasut pillugit sutigut tamatigut suleqatigiinnerup pitsanngorsarnissaa. Tassani Danmarkimit suleqateqarneq kisiat pinngilara, aammali suleqatigiinneq nunatsinni kommunit peqqinnissaqarfiullu akornanni.

Pineqaatissinneqarsimasut tarnikkut napparsimasut ukiorpassuarni sumiginarneqarsimapput, piffissanngorporlu, annertunerujussuarmik ukkatarineqalernissaat. Tamakku pissutigalugit



misissuisoqarnissaannik siunnersuut isumassarsiatsialaavoq.

Tamanna tunngavigalugu Demokraatit Inatsisartuni ilaasortaatitaannit AnnaWangenheim-imit siunnersuutaata silatusaartup akuerineqarnissaa innersuussutigineqarpoq Ilaqutariinnermut- aamma Peqqissutsimut ataatsimiititaliami suliareqqinneqarnissaa innersuussutigalugu.